



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**MAJLIS PELANCARAN PROGRAM ARKIB
KOMUNITI**

17 MEI 2025 (SABTU)

9.30 PAGI

**PEKARANGAN BANGUNAN GALERI WARISAN
MAJLIS BANDARAYA DIRAJA KLANG (MBDK)**

Terima kasih pengacara majlis.

Salam Perpaduan dan Salam Malaysia MADANI

SALUTASI

**Salutasi akan diberikan secara berasingan.*

PENDAHULUAN

1. Setinggi-tinggi penghargaan saya ucapkan kepada Arkib Negara di atas penganjuran **Majlis Pelancaran Program Arkib Komuniti**. Penghargaan terima kasih juga kepada **Datuk Bandar dan Majlis Bandaraya Diraja Klang (MBDK)** yang sudi menjadi rakan strategik Arkib Negara Malaysia dalam menganjurkan program ini.
2. **Dalam sejarah dunia, Arkib Komuniti telah bermula pada tahun 1926** berkaitan pendokumentasian sejarah kempen dan aktivisme wanita oleh Perpustakaan Wanita tertua di Britain yang sekarang dikenali sebagai Library of the London Society for Women's Service. Arkib komuniti ini dibina melalui sumbangan, hadiah dan pembelian daripada individu, penulis, komuniti dan sebagainya.
3. Seiring dengan itu, **Arkib Negara Malaysia (ANM) turut mempergiatkan usaha dengan mengadakan Program Arkib Komuniti dengan tumpuan kepada pemerolehan koleksi persendirian komuniti.**

4. Program ini adalah usaha untuk **'memasyarakatkan arkib'** bagi memperkasakan peranan komuniti dan masyarakatnya dalam memelihara khazanah warisan dan sejarah negara.

5. **Terdapat banyak sejarah dan peristiwa di peringkat komuniti dari sebelum merdeka sehingga kini masih tidak dapat dikumpul dan didokumentasi.** Cerita, pengalaman dan peristiwa yang berlaku dalam komuniti dapat menjadi sumber penting untuk memahami latar belakang sejarah, peristiwa dan perubahan yang berlaku dalam komuniti dan negara.

6. Sebagai contoh, **Bandar Klang yang ditubuhkan pada 1890 akan menyambut ulang tahun penubuhannya yang ke 135 tahun pada bulan Ogos nanti, pernah menjadi ibu kota negeri Selangor pada tahun 1875 hingga 1880.** Namun begitu, tidak ramai yang mengetahui dan cakna sejarah Daerah Klang yang merupakan antara daerah yang pernah menjadi jajahan takluk Kerajaan Melayu Melaka pada abad ke 15, yang mana Tun Perak adalah Penghulu Daerah Klang pada masa itu, dan dicatatkan dalam Buku Sejarah Melayu karya W.G. Shellabear yang diterbitkan pada tahun 1924.

7. Namun begitu, pengesanan, pemerolehan dan penyelidikan yang lebih terperinci berkaitan fakta ini perlu dilakukan dari semasa ke semasa bagi mendapatkan maklumat yang tepat dan sahih. **Penemuan sumber sejarah baharu akan dapat melengkapkan naratif pensejarahan negara dalam memahami sesuatu peristiwa yang berlaku pada masa lampau.**

KOLEKSI PERSENDIRIAN SEBAGAI WARISAN NEGARA

Hadirin yang dihormati sekalian,

8. **Sejarah negara kita bukan hanya tercatat dalam buku teks atau dokumen rasmi, tetapi juga hidup dalam pengalaman dan kisah-kisah komuniti kita.** Setiap kampung, bandar, dan kawasan mempunyai cerita unik yang membentuk identiti negara kita.

9. **Komuniti adalah asas kepada pembinaan sejarah negara.** Mereka adalah saksi kepada peristiwa penting, penjaga tradisi, dan penggerak perubahan. Tanpa penglibatan aktif komuniti, banyak aspek sejarah kita mungkin akan hilang ditelan zaman.

10. Sebagai contoh, **di George Town, komuniti yang terdiri daripada pelbagai etnik seperti Melayu, Cina, India, dan lain-lain, telah bersama-sama membina warisan budaya yang kaya dan unik.** Mereka tidak hanya menyumbang

kepada pembangunan fizikal bandar, tetapi juga kepada pemeliharaan warisan tidak ketara seperti seni, kraf, dan tradisi lisan.

11. Begitu juga dengan **komuniti Minangkabau di Negeri Sembilan, yang melalui sistem Adat Perpatih, telah membentuk struktur sosial dan politik yang unik.** Mereka memainkan peranan penting dalam pembentukan identiti negeri dan negara secara keseluruhannya .

12. **Komuniti Temuan, sebagai salah satu kumpulan Orang Asli, telah lama mengamalkan pertanian dan perhutanan sebagai sumber kehidupan.** Mereka bukan sahaja menjaga alam sekitar, tetapi juga mempertahankan budaya dan tradisi mereka yang kaya, walaupun menghadapi cabaran modenisasi.

13. Kisah-kisah ini menunjukkan bahawa komuniti bukan sahaja penerima perubahan, tetapi juga ejen aktif dalam membentuk sejarah dan budaya negara kita.

WAY FORWARD ARKIB NEGARA MALAYSIA

Hadirin yang saya muliakan sekalian,

14. Saya berharap **Program Arkib Komuniti disebar luaskan oleh Arkib Negara ke komuniti seluruh negara.** Saya menyeru Arkib Negara untuk turun padang dan mendekati individu, keluarga, tokoh, pertubuhan, purbawan (*collector*) dan komuniti yang memiliki koleksi bernilai sejarah.
15. **Arkib Komuniti juga boleh ditubuhkan di setiap komuniti dan daerah dengan kerjasama PBT di seluruh negara** dengan tujuan untuk mengekalkan penglibatan aktif komuniti dalam pengesanan, pengumpulan, pemerolehan dan pemeliharaan warisan sejarah negara.
16. Bagi **melengkapkan pendokumentasian sumber sejarah komuniti, Arkib Negara disarankan untuk membangunkan laman khas Arkib Komuniti.** Laman ini boleh berfungsi sebagai "**portal ke masa lalu**" di mana penyelidik, komuniti atau penyerah bahan dapat mengakses dan mendapatkan maklumat sejarah komuniti secara atas talian.

PENUTUP

Hadirin yang dikasihi sekalian,

17. Di kesempatan ini, saya mengalu-alukan penyertaan dari semua peringkat dan etnik tanpa mengira latar belakang agar dapat menyumbang koleksi persendirian kepada Arkib Negara. Usaha ini diharap dapat menarik penglibatan seluruh komuniti dan rakyat Malaysia yang mempunyai koleksi persendirian untuk diserahkan kepada Arkib Negara bagi melengkapkan koleksi bahan dan mengisi jurang maklumat sejarah sedia ada.

18. Akhir kata, sekali lagi saya ingin merakamkan ucapan setinggi-tinggi tahniah dan terima kasih kepada Arkib Negara, Majlis Bandaraya Diraja Klang (MBDK) dan rakan-rakan strategik lain yang telah banyak membantu dalam penganjuran dan kejayaan program ini.

Dengan ini, saya dengan sukacitanya merasmikan **Majlis Pelancaran Program Arkib Komuniti Tahun 2025**.

Sekian, terima kasih.